

王紅光 主編

朱良津 副主編

貴州省博物館藏珍稀古籍彙刊

GUANGXI NORMAL UNIVERSITY PRESS
廣西師範大學出版社



王紅光 主編

朱良津 副主編

貴州省博物館藏珍稀古籍彙刊

GUANGXI NORMAL UNIVERSITY PRESS
广西师范大学出版社



· 桂林 ·

Treasures for Scholars Worldwide

目錄

黔詩紀略後編三十卷 清莫庭芝、黎汝謙、陳田編 黔詩紀略補三卷 清陳田編 清宣統三年（1911）筱石氏京師刊本

卷十四至二十四

.....



黔詩紀略後編（二）

黔詩紀略後編

黔詩紀略後編卷十四

國朝

楊果勇芳

一首

芳字誠村松桃人幼讀書應試不售入行伍充書識
乾隆六十年黔楚逆苗石柳鄧石三保反以軍功游
擢鎮遠標千總嘉慶初隨經畧額勒登保勦川楚教
匪轉戰湖北四川陝西三省大小百戰所嚮克捷歷
官至甯陝鎮總兵賞花翎誠勇巴圖魯名號石筍河
之捷誠村以九騎追賊至南岸馳騎大呼賊驚亂溺
斃者千人其半渡者五舟水急舟重不能及岸連發
五矢五舟皆覆時有一矢射殺五百賊之謠誠村勇



冠諸軍甯陝為漢北第一巖疆控制子午華陽黑河
諸營汎以從征鄉勇六千充新兵楊芳屯田之制訪自漢
鼂錯言募民徙塞下及趙充國懇羌田頗著成效繼
而諸葛武侯耕渭濱鄧艾渠淮穎羊祜實荆襄皆祖
其法卽三代寓兵於農之意也終南山為三秦屏障
岷連楚吳綿亘三千餘里除關褒斜可通大路餘皆
層巒疊嶂密箐深林少民居我朝重熙累洽生齒
日繁乾隆年間始有安徽晉豫流民入山墾種始則
茅屋依山繼且衝衢布嶺秦中大吏因聚日多不可
無官彈壓乾隆四十五年奏准五郎地方設立通判
巡檢撥紫陽營千總一員駐紮十餘年來石田日闢
山民婦子恬嬉樂上自嘉慶二年教匪滋事藉南山
為遁逃藪大兵勦捕屢年始克肅清於是南山為緊
要之地不可不設立重鎮矣四年冬經大吏改通判
為同知添設總兵分寨十營以寓鈐制奉旨肇錫
嘉名改五郎廳為甯陝廳鎮卽曰甯陝鎮又於漢江
南岸西鄉銅敝等處添設新營蓋以鎮撫地方且令
隨征鄉勇卽有所歸一舉實兼兩善惟陝省各營兵
糧折色為多而例定折價山中不敷買食慮新兵之
無以計長久也稟請大吏具摺陳請暫節馬乾銀兩

置買地畝神裕生計以垂久遠荷蒙俞允伏惟我
皇上神聖文武連年平滅教匪無一不上煩廟算早
慶凱歌茲籌善後復俾新兵鼓腹山陬以資捍衛從
此南山二千餘里兵強民靖刁斗無驚無非永戴
天恩之汪濊矣蓋新兵皆募自鄉勇及山野遊民不
比平地各舊營素嫻紀律今既已裕其生計即可嚴
加訓練以銷其鴛鴦於前復警其驕恣於後以知山
氓之大可用也往者我兵接仗多利於平地賊眾轉
得恃山爲固今即以山中之人爲兵又即因山中之
田得食無事則耕鑿自如如有警則崎嶇素習執戈秉
耒素沐皇仁其爲有勇知方天良各矢當如何報
稱芳以黔中下士投筆從戎六年之中由行伍而擢
任專閫特簡重鎮聖恩愈厚悚惕彌深茲與省垣
各大吏商定此屯地章程悉心籌畫大抵利久則獎
每易生兵戒弱而強尤可慮既經因地制宜更在因
時立法庶幾終南保障固若金湯而古人屯田之意
可永奠秦疆矣爰刻貞珉兵皆百戰之餘號爲獷悍
而誌之以告後之來者

難制以藩司停給鹽米銀激變時誠村赴固原署提
督事聞變馳赴誠村拊膺將士素有恩方起事時賊

黨蒲大芳先護送誠村家屬至興安及戰賊輒引避
知賊可以義動也單騎馳入賊營諭以禍福賊衆大
哭縛首事二人出獻釋兵請降時欽差大臣德楞泰
諱其事以叛卒窮蹙乞命奏誠村遣戍伊犁未弔月
賜環補松桃協千總旋起廣東右翼總兵調西安鎮
總兵滑賊李文成反請効力調河北鎮總兵屢戰有
功事平賞雲騎尉世職加提督銜仍以總兵回西安
鎮勦南山伏賊一律肅清調漢中鎮總兵擢陝甘提
督歷直隸湖南固原提督道光六年回酋張格爾反
請從征命爲參贊大臣屢克捷七年收復和闐加騎
都尉世職在乾清門侍衛上行走歲將盡統兵出卡

擒張格爾是役也踰塞數千里破賊數十萬衆生獲
渠魁捷聞 詔封三等果勇侯 賞戴雙眼花孔雀翎
賜紫緡在御前侍衛上行走大俘禮成加太子太
保銜圖象紫光閣漢大臣以誠村爲首 御製贊云
黔省之英自幼知兵戰功久著謀而後行柯坪和闐
獨顯威名竭力追擒助大功成九年陛見 詔對二
十七次晉二等侯太子太傅銜十三年四川清溪土
千戶越嶲山夷滋事調四川提督事定晉一等侯十
四年夷復蠢動降二等侯以總兵發往甘肅候補十
六年鎮筸兵變起爲鎮筸總兵定善後章程永著爲
令遷廣西湖南提督二十一年海氛棘命爲參贊大

臣以議欵罷兵回湖南提督任請告歸在籍食俸年
七十七薨諡勤勇李元度云公結髮從戎經百戰戰
必躬先士卒所向未嘗挫衄少受楊忠武之知執從
子禮甚謹威望與忠武埒天下稱二楊而公受侯封
且先於忠武八年論者謂二楊勲績高天下而尤以
招撫甯陝新兵稱首何則南山起隴西尾商鄖阻奧
千餘里據川陝湖之腹而甯陝所治五郛形勢要害
又據南山秦嶺之腹新兵五千皆百戰之勇習流賊
故智使招撫遲數日賊已分突秦隴楚蜀殘良民老
師糜餉曷所紀極然非公威信服人奮不顧身入賊
穴亦莫能追數千出柙走險之虎兕使歸就閑勒也

孫子曰全軍爲上破軍次之公雖以此獲咎而功德
所被無涯矣所著有平平錄十卷續錄摘錄河洛要
言惕慮要言青囊衍易三元透易導善錄三式入門
壽世醫竅自錄年譜五卷

永州返棹經三浯步元次山窰尊原韻

大江水西來迴環繞幽亭窰尊凹石穴石以次山名亂峯嵌
江渚一掬傲東瀛秋雨溜不竭中睹蠅黽生有唐昔中葉災
黎慄洪溟漫叟吏春陵不忍獨爲醒時時發醉語嘲戲餘深
情當年持符地瘡痍滿荒城至今頌遺愛竹樹炊烟青亭小
難容席白雲環檐楹尊空留殘滴窰淺尙古形我來挹高風
時思攜甌餅陶然共一酌何必期淵明

洪秀才其斌

二首

其斌字素涵玉屏人乾隆中諸生

泊謝家渡

月映水波明露下林間白客途怨遙夜俯仰思今昔愴然獨
自吟幽思憑誰滌

雪

故國兵戈滿寒天雨雪深喜占新歲稔行見捷書臨昌水烟
波遠平山歲月侵北堂知健在長係百年心

唐陽山源準

三首

源準字以平遵義人知縣義伯曾孫嘉慶戊午舉人
以大挑分發廣東補陽山知縣以平署英德時豪民

李氏子殺人獻金二萬乞以人代償持不可以好語
給之出論如法一境惴伏再署欽州州境外有沃壤
百餘里內地民往墾田至數萬頃歲輸微息於粵南
夷民夷民黠者覬其利以升科請願輸五千金助官
以平曰吾民墾此田數世既升科則夷民爲田主責
重利以困吾民是區區者於國家不過太倉一粟置
之度外已二百年今忽利之納諸版圖如大體何且
地太版圖必添汎并外夷借以爲辭多生事端矣事
竟不行其通曉治體如此

柳州謁柳文惠公祠

山水發奇怪文章鑿險幽斯人長嶺徼知已一潮州落葉驚

風候變烟瘴雨秋墓門原咫尺瞻拜使人愁

詠水仙

碧天如水月遲遲獨抱琴心有所思一曲泠泠水仙操美人無語立江湄

野望

漠漠輕烟罩綠苔溪頭流水自潏洄絕憐空濶無人處一樹木棉花亂開

蘇訓導敬商

二首

敬商字西河桐梓人嘉慶戊午舉人官仁懷訓導有

雙梧詩稿

月下獨步